



Paraser:

Implementasaun Konvensaun Internasionál ba Direitu Sivíl no Polítika (ICCPR) liuhosi Perspetiva Lei Nú. 1/2006 kona-ba Liberdade Reuniaun no Manifestasaun

Introdusaun

Timor-Leste ratifika Paktu ka Konvensaun Internasionál ba Direitu Sivíl no Polítika (ICCPR)¹ iha 2003 ho Rezulusaun Nú. 3/2003 Parlamentu Nasionál nian² no publika iha Jornál Repúblika iha 23 Maiu 2003.

Iha Artigu 9.2 Konstituisaun RDTL prevee katak norma sira ne'ebé konsagra iha Konvensaun, Tratadu no Akordu Internasionál sira vigora automatikamente iha orden jurídika rai-laran depoisde aprovasaun no ratifikasaun ka adezaun hosi órgaun kompetente sira no depoisde publika iha Jornál Repúblika. Ida-ne'e, signifika katak instrumentu legál internasionál sira ne'e kesi ona Estadu Timor-Leste no obriga Timor-Leste atu kumpri nia obrigasaun/dever sira hodi halo tuir saida mak prevee ona iha enkuadramentu legál sira ne'e.

Intensaun hosi provizaun sira enkuadramentu legál nasionál no internasionál nian sira ne'e nian mak atu aseguira protesaun no promosaun direitu fundamentál sira sidadaun nian iha Estadu Direitu Demokrátiku ida-ne'e. Estadu iha obrigasaun atu kria polítika no mekanizmu legál sira ne'ebé regula ho espesifikamente kona-ba realizasaun direitu fundamentál sira ne'e, liuliu atu aseguira katak iha realizasaun ba direitu sira ne'e sei la iha impedimentu no la hamosu fali violasaun hasoru direitu no liberdade sidadaun seluk nian nomós atu proteje seguransa nasionál ka orden públika ka saúde ka morál públika nian hanesan prevee iha Artigu 19.3 a) & b) ICCPR nian.

ICCPR ne'e espesifikamente prevee no regula kona-ba direitu fundamentál lubuk ida sidadaun sira-nian relativamente ba direitu sivíl no polítika. Iha observasaun no analiza ida-ne'e, JSMP sei haree liu ba obrigasaun Estadu Timor-Leste nian hodi implementa ICCPR liuhosi kria polítika no mekanizmu legál hodi aseguira ezersísiu direitu no

¹ Bele haree konvensaun ne'e iha ne'e: <https://treaties.un.org/doc/publication/unts/volume%20999/volume-999-i-14668-english.pdf>

² Informasaun kompletu kona-ba rezolusaun ne'e iha ne'e: http://www.mj.gov.tl/jornal/public/docs/2002_2005/resolucao_parlamento/3_2003.pdf

liberdade fundamentál sira ba reuniaun no manifestaun ne'ebé prevee iha Artig 19 no 21 ICCPR nomós iha Artigu 40 no 42 Konstituisaun RDTL nian.

Antes adere ba konvensaun ne'e, antesipadamente Timor-Leste prevee tiha ona iha nia Konstituisaun Repúblika direitu fundamentál lubuk ida, inklui partikularmente direitu ba liberdade reuniaun no manifestasaun. Atu bele asegura direitu no liberdade ba reuniaun no manifestasaun ne'ebé prevee iha Artigu 42 Konstituisaun RDTL, Estadu liuhosi Parlamentu Nasionál kria Lei Nú.1/2006 kona-ba Liberdade Reuniaun no Manifestasaun. Provizaun sira Konstituisaun no lei ne'e prevee katak la iha nesesidade autorizasaun antes se sidadaun sira ezerse sira-nia direitu ba liberdade reuniaun no manifestasaun ne'e ho forma pasífika no la ho arma.

Manifestasaun nu'udar espresaun públika no opiniaun ka sentimentu hamutuk nian kona-ba asuntu públiku, sosiál ka buat hirak seluk ne'ebé parténsia ba interese komún. Manifestasaun bele abranje liuhosi forma oioin; purzemplu liuhosi komísio, desfile no korteju ne'ebé organizadu hanesan prevee iha Artigu 3 Lei Nú. 1/2006. Reuniaun tuir provizaun Artigu 2 Lei Nú. 1/2006 nian nu'udar ajuntamentu ema oioin iha fatin públiku ne'ebé nakloke ba públiku ka partikulár sira ho fin ka objetivu ne'ebé la kontráriu ho lei, morál, direitu ema seluk nian, orden públika no trankuilidade públiku nian.

Provizaun legál sira ne'e iha prinsípiu atu salva guarda no tane ás prinsípiu estadu direitu demokrátiku ne'ebé defini iha Konstituisaun RDTL kona-ba estadu demokrátiku, soberanu, ukun rasik-an no tane ás dignidade moris povu nian. Nune'e mós atu realiza objetivu estadu nian hanesan prevee iha Artigu 6 alinea (b) Konstituisaun katak estadu mak sei garante no promove sidadaun sira-nia direitu no liberdade fundamentál no respeitu ba estadu nia prinsípiu kona-ba demokrásia.

Observasaun JSMP nian ba implementasaun ICCPR, atraves hosi rezultadu entrevista ho entidade xave no relevante sira hanesan representante akadémiku³, sociedade sivíl⁴, eis-líder komunitáriu⁵, PDHJ⁶, Prezidente Konsellu Nasionál Joventude Timor-Leste⁷ no estudante universitáriu.⁸ Aleinde ne'e JSMP mós analiza ba enkuadramentu legál relevante sira. Hosi prosesu ne'e hatudu katak Timor-Leste nia polítika no mekanizmu legál ba asegura ezersísio ba direitu no liberdade ba reuniaun no manifestasaun seidauk reflète no kontráriu prinsípiu no espíritu ICCPR no Konstituisaun RDTL. JSMP observa

³ Entrevista ho Sr. Faustino Soares, Asistente Dosente Faculdade Filosofia UNTL iha 06/03/2018.

⁴ Entrevista ho Sr. Inocêncio de Jesus Xavier, Ativista no Ofisiál Relasaun Públiku hosi AJAR (Asian Justice and Rights) iha 22/02/2018.

⁵ Entrevista ho Sr. Manuel Corria, Eis Xefe Suku Santa Cruz iha 23/02/2018

⁶ Entrevista ho Sr. Horacio de Almeida, Adjuntu Provedór ba Direitu Umanu no Justisa (PDHJ) iha 06/03/2018.

⁷ Entrevista ho, Sra. Maria Didi Soares Magno, Prezidente Conselho Nasionál Joventude Timor-Leste (CNJTL) iha 22/02/2018.

⁸ Entrevista ho Sr. Crisognu Tatamailau Ana iha 09/02/2018.

katak provizaun balun sei falta no balun la nesesáriu no relevante, partikularmente artigu balun hosi Lei Nú. 1/2006 kona-ba liberdade ba reuniaun no manifestasaun.

Tuir mai sei lista artigu sira ne'ebé persiza halo alterasaun hosi Lei nú 1/2006, mak hanesan Artigu 5 kona-ba restrisaun, Artigu 8 kona-ba garantia ba ezersísiu ba liberdade, 9 aliñea 2 kona-ba ajente sira nia prezensa, Artigu 10 kona-ba avizu sira, Artigu 13 kona-ba identifikasaun fatin públiku no Artigu 14 no Artigu 15 kona-ba lei aplikavél sira ne'ebé lei ida ne'e refere ba iha prosesu krime nian, bainhira mosu aktu krime iha manifestasaun.

Detallu hosi Entrevista no Analiza Legál

Iha sesaun ida-ne'e JSMP sei deskreve ho detallu JSMP nia hanoin, analiza no rekomendasaun sira, inklui hosi entidade relevante sira ne'ebé JSMP halo entrevista kona-ba artigu sira hosi Lei Nú. 1/2006 nian ne'ebé konsidera la refléta espíritu ICCPR no Konstituisaun nian ne'ebé presiza halo revizaun no alterasaun.

1. Restrisaun ka bandu sira

Provizaun Artigu 5 kona-ba restrisaun ka bandu sira define katak atu realiza reuniaun no manifestasaun iha fatin públiku ka nakloke ba públiku menus hosi metru 100 hosi fatin ne'ebé lokaliza hanesan sede órgaun soberania nian, rezidénsia ofisiál titulár órgaun soberanian nian, instalasaun militar no militarizada, estabesimentu prizional, sede representasaun diplomátika no konsulár no sede partidu polítiku, inklui portu, araeroportu, instalasaun telekomunikasaun, sentrá ba produsaun enerjia elétrika, depózi no fatin armazenamentu bee nian, komustivel no materiál inflamavel.

Artigu 19.3 no 21 ICCPR nian prevee ho klaru katak sei laiha intervensaun no restrisaun ba iha ezersísiu ba direitu no liberdade fundamentál sira ne'e, maibé iha esesaun ba kazu sira ne'ebé relasiona ho salvaguarda interese nasional sira ne'ebé mak hanesan seguransa nasional ka seguransa pública, orden pública, protesaus ba saúde ka morál pública no protesaus ba direitu no liberdade ema seluk nian.

Bazeia ba JSMP nia observaun no analiza ba lei ne'e, nune'e mós rezultadu entrevista ho parte relevante sira, konsidera katak provizaun Artigu 5 nian kona-ba fatin, edifísiu no instalasaun sira ne'e iha relevánsia ba interese nasional sira ne'ebé presiza hetan protesaus, maibé restrisaun ba distánsia mak la refléta realidade Timor-Leste nian, partikularmente kapitál Dili. Distánsia edifísiu públiku sira iha kapitál Dili nian kuaze hothotu menus hosi metru 100. Se nune'e, Lei ne'e implisitamente la fó dalan ka bandu ona sidadaun sira atu bele espresa no manifesta sira-nia hanoin ba órgaun estadu sira ne'ebé sai alvu hodi bele rona no hatan ba sira-nia ezijénsia sira. Mezmuke manifestante sira nafatin espresa no manifesta sira-nian hanoin mós sei la ba iha sira-nia alvu, tanba distánsia dok liu. Normalmente manifestasaun sira nia-alvu mak instituisaun publiku ka

orgaun soberanu sira. Tanba ne'e artigu ne'e 5 hosi Lei nú 1/2006 ne'e la relevante atu aplika iha kontestu no realidade Timor-Leste.

Bazeia ba rezultadu observasaun JSMP nian nomós observasaun no analiza hosi parte sira seluk, durante ne'e hatudu katak dala barak manifestante sira ne'ebé atu halo manifestasaun hodi hato'o sira-nia hanoin no eziénsia hetan difikuldade tanba autóridade seguransa sira determina ona fatin ne'ebé dook liu hosi fatin ka edifísiu sira entidade estadu nian ne'ebé manifestante sira hakarak hato'o sira-nia hanoin no eziénsia, tanba distánsia menus hosi metru 100. Situasaun ne'e dalabarak lori implikasaun sériu ba atividade manifestasaun tanba autóridade seguransa sira intervein obrigatoriamente no destroi no halo violénsia hasoru manifestante sira. Esperiéncia ida-ne'e akontese dalabarak ona, inklui iha kazu foin lalais, polisia obriga, kaer/detein no halo violénsia hasoru manifestante sira hosi Movimentu Universitariu Timor-Leste (MUTL) ne'ebé halo asaun pasifika kontra polítika PN kona-ba sosa kareta 'Prado' ba deputadu sira Lejislatura Dalimak nian.

Tuir observasaun hosi parte sira ne'ebé halo entrevista haktuir katak manifestasaun hanesan última rekursu ne'ebé povu ka grupu sira hili hodi espresa sira-nia hanoin ka sentimentu ba interese públiku nian ba kestaun polítika balun ne'ebé kontra interese ema barak nian. Tanba ne'e, manifestasaun hanesan úniku meu ka dalan ba hetan solusaun no ka hodi fó influénsia ba desizaun públiku saida mak autóridade estadu sira halo kontra interese públiku nian ka la refleta aspirasaun ka interese povu tomak nian.

Atu asegura ezersísiu ba direitu no liberdade fundamentál sira ne'e ho di'ak no tuir dalan ne'ebé loos no própriu, JSMP no parte relevante sira ne'ebé hala'o entrevista rekomenda ba Governu no Parlamentu Nasionál atu:

- altera provizaun sira iha Artigu 5 Lei Nú. 1/2006 kona-ba liberdade reuniaun no manifestaun;
- halo uluk estudu viabilidade kona-ba distánsia molok halo alterasaun;
- haketak fatin no instalasaun sira ne'ebé risku boot liu ba seguransa nasional mak hanesan instalasaun militar (armazen sasán militar nian), instalasaun telekomunikasaun, sentráal ba produsaun enerjia elétrika, depóziitu no fatin armazenamentu bee nian, kombustivel no materiál inflamavel hodi bele aplika restrisaun ne'ebé maka'as nune'e bele evita risku ba dezastre ka seguransa nasional. Ba fatin no edifísiu sira seluk tenke hamenus nia restrisaun, partikularmente distánsia nune'e bele garante sidadaun sira bele espresa no manifesta sira-nia hanoin no interese ho di'ak tuir Konvensaun no Konstituisaun haruka.

2. Avizu préviu ka fó koiñesementu antes

Iha Artigu 21 ICCPR prevee katak la iha restrisaun ba reuniaun no manifestasaun ne'ebé pasífiku no Artigu 42.1 Konstituisaun RDTL kona-ba liberdade ba reuniaun no manifestasaun prevee katak ema hotu iha garantia ba liberdade reuniaun ne'ebé pasífiku no la ho arma no la iha nesesidade atu husu ka hetan autorizasaun antes ka prévia.

Tuir JSMP nian observasaun ba realidade no analiza ba provizaun sira ICCPR no Konstituisaun nian hatudu katak la iha obrigasaun ba sidadaun sira ne'ebé hakarak organiza no konvoka reuniaun hodi halo manifestasaun ne'ebé pasífiku no la ho arma atu husu linsensa ka autorizasaun ba instituisaun Estadu relevante hodi hala'o sira-nia direitu no liberdade ne'e. Provizaun sira ne'e mós la fó kompeténsia ba instituisaun Estadu relevante sira hodi foti desizaun atu autóridade ka lae ezersísiu ba reuniaun no manifestasaun ne'e. Mezmu nune'e, kontribuisaun hosi autóridade seguransa nian hodi aseguara realizasaun reuniaun no manifestasaun ne'ebé pasífiku no la ho arma ne'e mós importante hodi evita konfliktu ka konfrontasaun ema ka grupu seluk hasoru manifestante sira hanesan prevee iha Artigu 8 Lei Nú. 1/2006 nian.

JSMP preokupa ho interpretasaun ba avizu prévia ne'e tanba iha prátika autóridade sira-nia interpretasaun ba artigu refere kontráriu ho intensaun hosi artigu ne'e rasik hodi ezije manifestante sira ne'ebé durante ne'e halo manifestasaun hodi hato'o karta koñesimentu hodi hetan autorizasaun hosi autóridade polisiál molok halo manifestasaun.

JSMP rekomenda ba autóridade sivíl no polisiál sira ne'ebé lei ne'e rekere sira-nia responsabilidade la bele intervein hodi impede ezersísiu ba direitu no liberdade sidadaun sira-nian atu halo reuniaun no manifestasaun ne'ebé pasífiku no la ho arma liuhosi la fó autorizasaun bainhira hetan avizu antes kona-ba atividade ne'e. Ida-ne'e tanba lei la fó kompeténsia ba autóridade sivíl ka polisiál sira atu foti desizaun hodi autoriza ka lae reuniaun no manifestaun, lei fó de'it responsabilidade ba autóridade sivíl no polisiál atu aseguara ezersísiu ba direitu fundamentál sira sidadaun sira-nian ne'e la'o ho di'ak.

3. Responsabilidade no kontribuisaun autóridade sivíl no polisiál hodi aseguara ezersísiu direitu no liberdade ba reuniaun no manifestasaun.

Aseguara ezersísiu direitu fundamentál no liberdade sira sidadaun nian sai nu'udar objetivu no obrigasaun Estadu nian hanesan prevee iha Artigu 6 b) Konstituisaun RDTL nian. Nune'e, Estadu atu realiza nia objetivu no kumpri nia obrigasaun sira ne'e, iha Artigu 8 Lei Nú. 1/2006 kona-ba liberdade reuniaun no manifestasaun prevee ona kona-ba garantia ba ezersísiu liberdade ne'ebé kompete ba autóridade sivíl no polisiál iha fatin ne'ebé atu realiza ka ezerse direitu no liberdade ba reuniaun no manifestasaun ne'e. Iha Artigu 9 lei ne'e prevee kona-ba obrigasaun autóridade polisiál iha manutensaun orden ba

reuniaun no manifestasaun ne'ebé hala'o iha fatin ne'ebé taka ba públiku bainhira husu sira-nia prezensa ka apoiu.

JSMP hanoin katak provizaun legál ne'e di'ak ona atu bele asegura ezersísu ba liberdade reuniaun no manifestasaun. Maibé dala barak JSMP observa katak manifestasaun sira ne'ebé akontese durante ne'e, konfrontasaun, sira la mai hosi parte seluk, maibé mai fali hosi autoridade polisiál sira hasoru manifestante sira. Tuir loloos, lei fó knaar ba autoridade polisiál atu asegura no evita mosu konfrontasaun ne'ebé bele infiltra hosi ema ka grupu seluk (deskoñesidu) hasoru manifestante sira, la'ós autoridade polisiál sira mak prova no kria fali konfrontasaun. JSMP observa katak problema ne'e dala barak akontese tanba kestaun distánsia prezensa autoridade polisiál sira iha fatin reuniaun no manifestasaun. Autoridade polisiál sira-nia prezensa besik liu ba fatin manifestante sira-nian ne'ebé bele halo manifestante sira sente la konfortavel hodi hamosu konfrontasaun.

JSMP rekomenda ba Parlamentu Nasionál atu bele hadi'a Artigu 8 no 9 Lei Nú. 1/2006 hodi aumenta tan aliñeia ida no defini distánsia prezensa autoridade polisiál sira-nian hosi fatin manifestasaun atu evita konfrontasaun entre parte rua iha tereinu. JSMP sujere atu distánsia maizumenus entre metru 15-25 hosi fatin manifestasaun nian.

4. Identifika no defini fatin públiku sira ba manifestasaun

Artigu 13 Lei Nú. 1/2006 fó kompeténsia ba autoridade sivíl no polisiál sira hodi identifika no define fatin públiku sira ne'ebé sidadaun sira uza hodi ezerse sira-nia direitu no liberdade ba reuniaun no manifestasaun.

Tuir JSMP nia hanoin no analiza, provizaun ne'e la nesesáriu no la iha relevánsia. Provizaun sira iha ICCPR no Konstituisaun RDTL nian bandu atu restrinje ezersísu ba liberdade reuniaun no manifestasaun, exetu ba fatin no kestaun balun ba interese nasional no ba protesasaun direitu no liberdade ema seluk nian. Artigu 5 Lei Nú. 1/2006 restrinje tiha ona distánsia ba reuniaun no manifestaun ne'ebé hala'o fatin, instalasaun no edifisiu públiku balun. Artigu 42.2 Konstituisaun RDTL no Artigu 4.1 Lei Nú. 1/2006 prevee ona katak la presiza autorizasaun prévia ka la presiza husu autorizasaun antes ba reuniaun no manifestasaun sira ne'ebé hala'o ho forma pasífika no la ho arma. Artigu 10 Lei Nú. 1/2006 prevee de'it kona-ba avizu prévia ba autoridade sivíl no polisiál, nune'e sira bele iha koñesimentu no kumpri sira-nia devér ne'ebé prevee iha Artigu 6 b) Konstituisaun RDTL no Artigu 8 ho 9 Lei Nú. 1/2006 hodi proteje no promove direitu no liberdade fundamentál sira sidadaun nian nomós atu asegura ezersísu ba direitu no liberdade sira ne'e.

JSMP hanoin katak ICCPR, Konstituisaun no lei la fó kompeténsia ba autóridade sivíl no polisiál atu autoriza ka lae ezersísiu liberdade reuniaun no manifestaun ho forma pasífika no la ho arma, tuir loloos lei la bele fó fali kompeténsia ba autóridade sivíl no polisiál hodi identifika no determina fatin ba sidadaun sira ezerse sira-nia direitu no liberdade ba reuniaun no manifestasaun. Sidadaun sira tuir loloos livre atu hili fatin públiku sira ne'ebé sira hakarak atu ezerse sira-nia direitu no liberdade ba reuniaun no manifestasaun ne'ebé iha forma pasífika no la ho arma. Autóridade sivíl no polisiál sira bele intervein bainhira ezersísiu direitu no liberdade ne'e kontra enkuadramentu legál sira ka viola restrisaun sira hanesan prevee iha Artigu 7 Lei Nú. 1/2006.

Bazeia ba razaun sira ne'e, JSMP rekomenda ba Parlamentu Nasionál atu revoga tiha Artigu 13 Lei Nú. 1/2006, nune'e la bele kontráriu fali ho provizaun sira ICCPR, Konstituisaun no provizaun sira seluk iha lei ne'e rasik.

Konkluzaan no Rekomendasaun sira

Valór boot liu no aas liu iha Estadu Direitu Demokrátika mak iha garantia totál ba direitu no liberdade fundamentál sira sidadaun sira-nian inkluzivamente direitu no liberdade ba reuniaun no manifestasaun. Estadu iha pontu no sentidu ida ne'e iha devér no obligasaun atu asegura plena ezersísiu ba direitu no liberdade fundamentál sira ne'e. Dalan atu kumpri devér no obligasaun sira Estadu nian mak liuhosi kria polítika no mekanizmu legál sira ne'ebé di'ak, loos no apropriadu tuir prinsípiu sira ne'ebé konsagra ona iha ICCPR no Konstituisaun RDTL.

Estadu Timor-Leste adota ona ICCPR nu'udar instrumentu legál internasionál ne'ebé proteje no promove direitu no liberdade fundamental sira sidadaun nian iha area sivíl no polítika. Timor-Leste mós prevee ona iha nia Konstituisaun Repúblika kona-ba protesaun no promosaun direitu no liberdade fundamentál sira ne'e. Atu asegura ezersísiu ba direitu no liberdade sira ne'e, Estadu mós kria polítika no enkuadramentu legál espesífiku ba ezersísiu liberdade reuniaun no manifestasaun. Mezmu nune'e, JSMP no parte relevante sira haree no hanoin katak polítika no enkuadramentu legál ne'e seidak refléta ho di'ak espíritu ne'ebé konsagra iha ICCPR no Konstituisaun RDTL. Nune'e, tuir mai JSMP liuhosi paraser badak ida ne'e rekomenda ba Parlamentu Nasionál atu bele haree no tau iha konsiderasaun pontu hirak ne'e hodi hadi'a fali Lei Nú. 1/2006 nian.

Rekomendasaun sira hanesan tuir mai ne'e:

Parlamentu Nasionál

- hadi'a ka altera provizaun sira iha Artigu 5 Lei Nú. 1/2006 kona-ba liberdade reuniaun no manifestaun;
 - halo uluk estudu viabilidade kona-ba distánsia molok halo alterasaun;

- haketak fatin no instalasaun sira ne'ebé risku boot liu ba seguransa nasional mak hanesan instalasaun militar (armazen sasán militar nian), instalasaun telekomunikasaun, sentral ba produsaun enerjia elétrika, depóztu no fatin armazenamentu bee nian, kombustivel no material inflamavel hodi bele aplika restrisaun ne'ebé maka'as nune'e bele evita risku ba dezastre ka seguransa nasional. Ba fatin no edifisiu sira seluk tenke hamenus nia restrisaun, partikularmente distansia nune'e bele garante sidadaun sira bele espresa no manifesta sira-nia hanoin no interese ho di'ak tuir Konvensaun no Konstituisaun haruka.
- atu bele hadi'a Artigu 8 no 9 Lei Nú. 1/2006 hodi aumenta tan aliñeia ida hodi defini distansia prezensa autoridade polisial sira-nian hosi fatin manifestasaun atu evita konfrontasaun entre parte rua iha tereinu. JSMP sujere atu distansia maizumenus metru 15-25 hosi fatin manifestasaun nian;
- revoga tiha Artigu 13 Lei Nú. 1/2006, nune'e la bele kontráriu fali ho provizaun sira ICCPR, Konstituisaun no provizaun sira seluk iha lei ne'e rasik.

Autóridade Sivíl no Polisial:

La bele intervein hodi impede ezersisiu ba direitu no liberdade sidadaun sira-nian atu halo reuniaun no manifestasaun ne'ebé pasífiku no la ho arma liuhosi la fó autorizasaun bainhira hetan avizu antes kona-ba atividade ne'e. Ida ne'e tanba lei la fó kompeténsia ba autoridade sivíl ka polisial sira atu foti desizaun hodi autoriza ka lae reuniaun no manifestaun, lei fó de'it responsabilidade ba autoridade sivíl no polisial atu asegura ezersisiu ba direitu fundamentál sira sidadaun sira-nian ne'e la'o ho di'ak.

Dili, 26 Outubru 2018

Luis de Oliveira Sampaio
Diretór Ezekutivu JSMP